

## Хутбе 9

Сайгылы мусульманлар!

Бугуньки хутбемизнинъ мевзусы – истинджа ве истибра акъкъында оладжакътыр. Пейгъамбер Эфендимиз салляллаһу алейһи весселлем бир Хадис-и Шерифте буюрды:

Манасы: «Сийдиктен темизленинъиз, чюнки къабир азабынынъ чогуьусы – сийдикке былашмакътандыр».

Истинджа – бу инсаннынъ аврет еринден чыкъкъан писликтен темизленмектир. Истибра исе – туалет ихтияджыны битирген сонъ алдын аврет ичинде къалгъан писликни чыкъармакътыр. Эгер инсан бу писликнен беденини я да урбасыны кирлетеджегини бильсе, онъа бу писликни кученип я да башкъа аркет япып чыкъармакъ фарздыр. Буны япмайып, озюни кирлетсе, буюк гунаһкъа тюшер, бу неджасетнен намазыны къылса, намазы догъру олмаз.

Пейгъамбер Эфендимиз эки къабирнинъ янындан кечип, къабирде яткъан инсанлар акъкъында озь-озюне айтты: «Булар къабирлеринде азап чекелер. Эбет, буюк гунаһ ишлегенлери ичюн азап чекелер. Биринджиси – инсанлар арасында фитнелер япа эди, экинджиси – сийдиктен темизленмей эди». Сонъра Пейгъамбер Эфендимиз терекнинъ яш талыны инсанлардан истеди. Талны алып, экиге больди ве бу эки къабирнинъ устюне къадап салды ве деди: «Умют этем, бу – оларнынъ азапларыны энгиллештир».

Сайгылы мусульманлар!

Бу хадистен анълашыла ки, къабир азабы бар ве азапларнынъ чокъусы – фитнеден ве сийдиктен темизленмементендир. Ве даа шуны анъламакъ мумкюн, терек талынынъ зикирлеринден къабирдеки мусульманлар файдаланса, шубесиз, мусульманнынъ къабир башында я да эвде Къур'ан окъумасындан къабирдеки му'минлер файдаланыр.

Бу, хызбут-тахрирлернинъ къабир азабыны инкяр этмелери янълыш олгъаныны косътере ве ваһхабилернинъ олюерге Къур'ан окъуманынъ инкяр этмелерини де янълыш олгъаныны исбатлай.

Сайгылы мусульманлар!

Истинджа меселесинде дикъкъатлы олмакъ керек. Шунунъ ичюн аврет ерлерини догъру темизлемеге бильмек керекмиз.

Базы инсанлар авучларына сув алып неджасетли олгъан аврет ерлерине тийсетип ювалар. Бу догъру дегиль. Догъру олгъаны – онъ къолуман къумандаки сувны неджасет ерине тѣкип, сол къолуман аврет ерини чайкъамакътыр. Авучына сув алып аврет ерини ювмакъ олмаз.

Аллаһ бизни, ичи ве тышы темиз инсанлардан ве ибадетини догъру япкъанлардан эйлесин!